

尺岡草堂遺集

尺岡草堂遺詩卷一目錄

舟夜

羈客

雜詩

秋感

送伍大襄卿就館多浦

雲泉山館歌呈香石先生

宿招二水樵寓齋

顏紫虛半園

看梅學海棠乘月至越王臺同李大恢垣作

海雲寺和崔山存

辛丑二月書事

城中解嚴索米村落道中感賦

板橋黎十儕石軒壁自畫邏岡探梅圖囑題爲書

長句

渡獅子洋過波羅江口

招同伍襄卿招水樵單小泉集塵隙草堂贈主人

何岳緣

游西樵白半山亭至石排村四首

大科峯觀日出值雨宿村舍曉猶未晴也

翠巖

宿白雲洞龕嵒閣

白雲洞樓觀前游所未覩近有假呂仙扶鸞者世俗崇信布金成此有司以其惑民驅之去而洞中煥然一新云

下山與岳緣別

橫沙訪水樵并題其知稼樓

岳緣贈漆硯賦此爲謝之

哭何小袁

游靈峯寶陀寺

贈蔣香雪

和家朗山孝廉良玉宿永勝寺用昌黎山石韻

雜感四首

雨登鎮海樓

贈歐陽君墀茂才

游白雲山宿安期巖同單小泉

題涉公片雲行草

溪上雜題

開歲後連日郊行同紫虛作呈香石師

鄧蔭泉杏林莊

光孝寺虞仲翔祠

大風過石門

送家朗山粵西之行

訶林秋興

烏渚祥鎮軍祠

經北門三元里憶辛丑鄉民殺虜事

古鏡篇

羚羊峽

尺岡草堂遺詩卷一 目錄終

尺岡草堂遺詩卷之一

番禺陳璞著

舟夜

暮色滿沙渚  
滄波路未窮  
空江鳴夜雨  
獨客掩孤篷  
寥泚吾何適  
漂搖事略同  
晨興復理櫂  
烟水尚溟濛

羈客

羈客類棲燕  
依人年復年  
圓窗似孤月  
夜夜到牀前  
風竹答清嘯  
露蛩娛未眠  
幽懷不盈握  
一縷化爐烟

雜詩

飛樓玉作棟  
複閣雲爲梁  
中有絕世姿  
獨居閉瑤窗  
華



妝洗紅粉玉骨如秋霜願得吹簫人騎鳳相翱翔

極北有高峯嵯峨絕塵境俯視天下山空濛露其頂仙人卧重雲萬古醉不醒我欲往呼之長風遠相屏

小舟浮大海短檣駕高浪中途雷雨至顛播倏萬狀不逢巨艦過已付魚腹葬汝氣亦壯哉亦太不自量

南山木百圍槎枒戰霜雪山深寒氣嚴枝葉日摧折不憂枝葉摧但懼本根撥奚以固本根深土勿自伐

猛虎恣吞噬百獸去原野人境愈周防犬豕出亦寡經年不得食困饑死巖下若但不食人或畜之者

珍裘有奇溫取之百狐腋美錦見文章乃用千絲織至

計非一念至明非一隙如何舍萬卷高論逞句臆

秋感

木落江城秋色殘霜風振觸易無端壯心胡馬思邊草  
生事鮎魚上竹竿薄酒何能千日醉大裘須覆萬家寒  
長空極目增蕭瑟轉喜澄清天地寬

送伍大襄卿就館茅浦

細雨孤帆趁早春頻年旅食異鄉身嵌寄厯落難諧俗  
儒雅風流卻近人相對轉愁同寂寂將離又悔去僣僣  
送君未抵陽關遠一葦能杭便愴神

雲泉山館歌呈香石先生

名山自昔僧占多誰歟築室棲松蘿前開戶牖俯絕澗  
後有亭榭窺江波壓檐薌岫擁紫翠繞屋杉檜交枝柯  
七子當年盡詩老結構此地爲詩窩更祀三賢黃泰泉  
崔菊坡與蘇東坡吟嘯以來三十載猿鶴歡呼山鬼歌  
至今遊者襍被宿借榻不復煩維摩我來遍覽二十境  
醉臥澗底顏微酡寒泉泠泠滌肺腑瘦石齒齒供摩挲  
夜涼月上照幽寂雜以風葉如吟哦忽思前賢悉愛此  
爲遠塵俗高嵯峨地以人傳遂千載神仙荒渺難同科  
我輩寰中一粟耳終與歲月歸消磨偶然至此恣幽討  
有似雪印飛鴻過嗚呼崇構亦豈終可保惟有名流萬

古流江河

宿招二水樵寓齋

招子讀書處不寬而靜便涓涓瀉竹露裊裊篆爐烟持  
酒從君醉支床許對眠屋山見殘月移影過簾前

顏紫虛半園

讀書堂外闢餘地割取禺山半林翠未能全身置邱壑  
且分一桁供遊戲四時風景難遍賞祇得春秋亦足慰  
人生朝夕豈長閱秉燭夜遊詎非計壺公一壺處已狹  
又向壺中剖爲二短榻容膝窗見肘矮屋礙眉路交臂  
奇峯如削或未成好花粗有無求備客來亦復雜忙閒

酒後何妨具醒醉戲君呼君作半人癡點付君稱君意  
看梅學海棠乘月至越王臺同李大恢垣作

蕭蕭疎影轉迴廊冉冉幽香暗草堂小酌並邀花酩酊  
夜遊還趁月昏黃烟沉野戍嚴更斷露冷空臺霸業荒  
萬籟此時都闌寂一聲唳鶴出叢篁

海雲寺和崔山存

寺爲天然和尚開山  
距山存所居村二里

不必去人境林深自寂寥淪泉供客茗掃葉拾僧樵人  
社高賢聚開堂故事遙疎鐘猶動曉喬木已前朝

辛丑二月書事

妖星墮地雷轟鳴虎門忽報天險傾傳烽一夜照珠海

城門不啟萬戶驚我未及盟走相視閭巷男婦扶伶俚  
城外欲入內欲出雨不得遂相擠并愁雲慘澹韶日精  
倉黃登陴官點兵雙貂綴冠騎大馬父老眙聘所未經  
登高東望獵德口冠舶三四停沙汀江空無人潸烟水  
捍禦似但憑孤城城中眾亦百十萬自可制挺懲蠻荆  
城頭嗚嗚吹夜角雜以刀槊鏖聲驚魂竟夕不敢寐  
吁嗟久已嬉承平

城中解嚴索米村落道中感賦

曉星殘月映波明小艇輕橈傍岸行飛鳥出爲饑渴計  
海潮來尙戰爭聲時危慷慨中流機事過伶俚野戍兵

七尺頑軀詎無用多牛翁處去傭耕

板橋黎十儕石軒壁自畫邏岡探梅圖囑題爲書

長句

邏岡之遊昔不果忽忽坐閱今幾春儕石山人有仙骨  
年年一問梅花津山光林影久饜飫歸唾壁上何嶙峋  
寒香萬片沁肺腑奔赴腕下相鮮新我來見之起歎息  
人生安得長閒身襍被山中與終古不須策蹇行跋踈  
近復江關愁兵塵道路十里生荆榛欲往從之畏豺虎  
仙山更隔天一垠山移地縮忽在眼儕石下筆如有神  
從此北窗臥相對屏卻杖屨勿復陳黃昏月色照清夜

定有餘芬散四鄰

渡獅子洋過波羅江口

巨浪浮空三萬頃輕舟搖出淼瀾間沙鷺沒漲平無岸  
天末凝雲矗作山雷雨但愁來咫尺蛟鼉得意恣驕頑  
何人議建屯田策盡涸滄溟賸一灣時有議填此洋而作屯田留一小河以出入者奇甚

招同伍襄卿招水樵單小泉集塵隙草堂贈主人

何岳緣

秋色年年好閒身能幾何重邀今夜月尊酒又相過斗  
室有佳趣斯人能詠歌閉門市塵遠僻似住烟蘿



遊西樵自半山亭至石排村四首

危亭踞半山梯登已百級重重撥烟嵐翠撲衣袂溼林  
開疊巘來山缺滄江入縹緲乘石磴山風乍吹笠  
連畦八九里曠若在平陸提籠采茶女笑語出空谷山  
中風氣樸林下生事足游人渴乞漿一甌注醺醪  
松篁忽蔽天其下微有逕積翠無冬春經雨益蒼靚森  
森行轉迷曲曲步難竟僻處不逢人清泉滿幽聽  
一犬隔竹吠萬綠環烟村倚山屋似樓樹杪開柴門門  
前碧澗水竟日聲浚浚此間有佳趣勿爲外人言

大科峯觀日出值雨宿村舍曉猶未晴也

一峯如覆釜乃作眾峯長登者無艱躋居者有安壤故  
人住其旁簡弁羣茂才村居致森爽羅浮雞一鳴奇照無異  
象莫慰葵藿心寒雨蔽曦朗草廬爲解榻留醉傾家釀  
曉起踏烟雲空濛亦千狀潏鬱忽一氣浩若浮萍泱無  
覩喜有聞松濤四山響

### 翠巖

幽巖宿重雲積蘚青入石疎花細竹間隱隱瀉寒碧飛  
樓住半空翠擘石爲壁中有古仙人幽棲鍊玉液我往  
一訪之樓空杳無迹但聞雨瀟瀟迸作巖泉滴

### 宿白雲洞龕從閣

崇構嵌厓丹明窗鑿山翠駕空檐側飛下瞰石半墜澗  
轉來術失門出密篠闕瀑聲塞一星終日風雨沸登樓  
危檻橫倚牖石洞對洞中白玉龍飛舞下檐際入夜翻  
雪光月出更清麗昨來連日雨鼓勇數烟髻天公憐我  
癡今許作晴霽仰首天宇高明星墮襟袂

白雲洞樓觀前遊所未覩近有假呂仙扶鸞者世  
俗崇信布金成此有司以其惑民驅之去而洞  
中煥然一新云

林泉舊約會相識樓閣新成卻未經雪印難尋前度迹  
烟嵐不改昔年青幽巖絕壑連雲棧碧磴丹梯上翠屏

何意華嚴彈指現名山可信有仙靈

下山與岳緣別

三度雲中宿青山卽故人  
况逢山上客夢契素相親  
去暫爲別悠悠再問津  
數峯情似汝相送到江濱

橫沙訪水樵并題其知稼樓

疎林通古渡孤櫂向江村  
潮闊欲浮岸竹深聞斂門  
花間燒短燭石上倒清尊  
夜靜軒窗外風林相與言

樓敞曉登眺疎櫺面面開  
檐迴山翠近簾捲稻香來  
稼

穡豈君事艱難期汝才  
榜題深意在書亦似西臺  
樓額

月航先  
生手筆

岳緣贈漆硯賦此爲謝之

硯以木爲質外以漆屑塗之便可研墨甚輕便

揚州近製也

硯名漆沙硯見思適齋集

故人憐我日磨鐵遺以漆硯歎奇絕誰從天上割紫雲  
持向窗前凝蒼雪質輕頗便行篋攜墨留竟不微凹缺  
佳硯由來重端石居民鑿山山迸裂百人魚貫穿崇巖  
十里蛇行入幽穴重淵沈沈深莫測失足一墮下如瞥  
窮民性命輕鴻毛供汝書生動饒舌邇來文字亦何用  
空令地寶日搜抉此研曾無十夫工佐我傭書未爲褻  
製奇用廣不重費下洞西坑恐相埒况復端材近已少

市人質作爭狡獪縱有千金可羅致恐無隻眼與鑒別  
作詩調笑謝故人從此端巖可局鐻

哭何小袁

悠悠天道果難知凶問初聞驚復疑寒熱偶乖無死法  
膏肓不治亦庸醫年華彈指今猶昔風義平生友與師  
再鼓高山流水曲蒼茫無處覓鍾期

遊靈峯寶陀寺

江流忽中開湧作十丈綠上有古禪棲飛甍出林木落  
日來敞門乞就雲際宿療飢厨有芋照夜殿無燭驚人  
鴉翻林映榻月穿屋高臺懷蘇公幻影託金粟前身爲

德雲後身當誰屬請公下轉語公亦大捧腹夜深江氣  
涼野迴山勢獨露天白無際攬之不盈掬且玩眼前景  
來往休自枯

贈蔣香雪

城南秋色莽蕭蕭樽酒憑誰話寂寥喚出秦娘歌一曲  
青衫翻覺淚痕銷

嘆我羈棲歲月過豪懷十載盡消磨不須更聽瀟瀟曲  
已向樽前喚奈何

和家朗山孝廉

良玉

宿永勝寺用昌黎山石韻

長林蕭瑟蒼翠微叢篁時有秋鶴飛畦隴連村稻梗熟

陂塘繞寺鱸鰕肥  
閒來招邀屢出郭  
山僧好客今所稀  
遠公肯聽陶令飲  
參寥輒慰坡老饑  
雲堂飯罷日欲暝  
數聲清磬扃山扉  
夜深涼月散清影  
遠掃霧靄開烟霏  
池荷枯葉搖萬柄  
草蟲幽砌喧一圍  
湛然久坐濯心魄  
那畏冷露寒侵衣  
人生終歲不一出  
不知局促誰爲轡  
朝來朔風變凜冽  
凍若可忍猶忘歸

雜感四首

青松拔地想干霄  
鬱鬱低蟠百尺條  
偃蹇只堪歌在澗  
輪囷幸未斧爲樵  
窮山終古誰真賞  
老幹何心見後凋  
雨露冰霜雨無與  
不爭絢爛不蕭蕭



木落秋清征雁迴霜天雲外數聲哀江湖渺渺向何處  
關塞年年遠自來每懼弋人施繳矢側看翠鳥集蓬萊  
啾啾甘受金籠困翻笑高飛羽翮摧

擾擾浮生幾笑號茫茫人海足波濤詭詞莫辨臧三耳  
利物爭誇拔一毛得失雞蟲終亦了相纏鵲蚌獨何牢  
王孫挾彈窺黃雀冷露濛濛涇錦袍

徐福求仙去不還東方索米戀人間恨深精衛思填海  
恩重靈鼇力戴山志有未償期必遂性原各具不相關  
從知逐臭猶真嗜勝似絲麻棄蒯管

雨登鎮海樓

欄檻排雲出炎陬指顧中海山入風雨一氣混鴻濛莫  
辨神州處翻思帝座通茫如無畔岸借以盪心胸

贈歐陽君堦茂才

朝成百賦暮千詩才調豪於杜牧之珠玉在胸呵便出  
膽肝如面見先知香囊賭去輕相覓繡被堆來不自持  
此事憐君太無賴侵尋禪榻鬢添絲

遊白雲山宿安期巖同單小泉

蕭爽動游興秋晴躡屐宜幽巖龍穴邃高閣鳥巢危鶴  
老隨仙去雲閒與客期更邀山月上長遂倚闌吹  
夜色併秋色脩脩一味清况於巖谷處時有竹松聲露

重冷初結月涼高更明老僧同不寐坐待曉霞生

題涉公片雲行草

詩人貴妙悟佳句通於禪華嚴現彈指思出萬象前既  
無迹可求焉有言可詮禪伯空諸有文字皆蹉跎拈花  
但微笑意豈在簡編枯坐滅聲聞詎藉詩歌傳夙世謬  
詞客結習今未捐前身慧業人才藻出生天鳥獸及草  
木一一有因緣悠然入懷抱不覺相流連漸多紙墨積  
聊假梨棗鐫早知亦幻影變滅隨風烟

溪上雜題

宿雨乍晴烟未消水松溪路晚蕭蕭短篷傍岸一篙紱

知是空江初落潮

赤欄橋下碧如油  
淺浴鳬鷺深沒鷗  
最是數灣幽折處  
誰家楊柳水邊樓

菱塘荷沼帶平川  
曲渚迴洲互接連  
亭午風清波浪靜  
菰蒲穩護野鳬眠

日落雲陰江路微  
沙邊欸乃聽依稀  
隔溪月出光到水  
照着打魚船夜歸

開歲後連日郊行同紫虛作呈香石師

早春風日暖佳興在林邱  
郭北纔清醉城西亦勝游  
雲沈雙嶺出樹抱一溪流  
回首青山外蒼蒼暝色浮

勤動輒終歲春初得暫休遨遊無遠近佳處一勾留莎  
碧山橋路花明斷港舟年年長此樂以外復何求

鄧隱泉杏林莊

隱泉自號長眉道人嘗鍊藥於此莊

六藥羅浮山上客築廬烟雨井邊村重重樹影碧環屋

曲曲溪流清到門時約醉翁來對酒更逢石友各忘言

中有友石亭

游入但問枝頭杏先放春光出短垣

園內杏樹

由江南移植

光孝寺虞仲翔祠

骨體不能媚沈淪瘴海湄難儕吳郡吏獨殿漢經師授  
筆容相仿風旛又一時當年無弔客終古有遺祠

大風過石門

雲黯一江昏揚帆下石門樹迎飛櫂出厓東亂流奔故壘餘兵氣長隄沒漲痕艱難民力盡愁聽榜人論

送家朗山粵西之行

桂林鬱蒼蒼山水甲天壤拔地插飛劍傾天瀉懸浪巉石捫有稜銘峯鬱相望流曲賜九迴灘奔勢十盪我讀柳侯文想見崛奇狀造物慘經營乃有此意匠異境誰領取奇士庶用餉匄中鬱勃才藉藉發雄放吾鄉往游者海雪最豪宕近則黎與倪二樵秋槎健筆亦高抗此外復何人相與飛頡伉吾家梅窩子襟抱特清曠赴腕千雷

平旦日百川漲揮灑發天機彫鏤窮物相昔曾燕薊遊  
屋宇宏壯黃河萬里來滾滾入豪唱還家一年餘寂  
寞卧紙帳天公忽顧之汝才未大暢窮荒有奧區滄鬱  
擁萬嶂烟雲待鐫剗今以汝相貺是時朔風號凍雨黯  
江上倉卒走別我挂席神彌王知君樂勝游銳意快所  
向壯哉丈夫志千里何足尚他年秦蜀中還期一筇迂

訶林秋興

一年蕭寺住贏得夏涼多亦喜秋風早其如落葉何鉛  
刀仍貴割鏤硯未辭磨翹首長空淨啾啾斥鷃過

烏溪祥鎮軍祠

鎮軍名福辛丑之役奉調率鎮軍兵來粵守烏  
潞夷人犯虎門越日犯烏潞鎮軍與戰死之軍  
士從死無一免者士人聚其遺骸爲大塚葬焉  
事

聞賜祠於其地冬日過謁成二十二韻

一夜天關陷誰人復死忠

沙角陷陳將軍連陞死之虎門陷關提軍天培死之嗣後

死守者惟公耳

藥書思避敵魏絳利和戎獨有熊羆士猶懷鷹

隼功孤軍屯岍曲橫海陬幢幃陣矗如山陴營危背水  
攻方張兇燄熾誓死戰心雄透爪拳初握衝冠髮欲蓬  
箠抽金僕盡餒探革囊空再接再志彌厲無援勢卒窮裹



創刀黥黥殷血鼓薩薩草際羞求活門開預鑿凶氣方

吞羯虜兵遽化沙蟲自失僧騰將都憑矍鑠翁時參贊大臣楊

果勇侯芳年八十餘矣韜鈴惟壓勝嬉戲近兒童盡收城中婦女

使敵不鳴書屢聞飛捷貂咸插侍中岡頭鏖鬪斂城下舊

盟通鳳皇一戰不捷即議款事過矜明哲師旋獲考終詎容公論

紂已負國恩隆獨此崇祠在相鄰故壘同荒墳從弔

岳大樹每思馮凜凜猶生氣稜稜起朔風至今師海浪

尙撼虎門東

經北門三元里憶辛丑鄉民殺虜事

當事低眉語時已議款前村奮臂呼解紛來長吏遺廣州府余公亟馳

往勸敵愾有田夫異類人心憤鄉愚戰膽麤國殤今共

禮義勇祠祀死事者貝胄愧公徒

險隘重重失千軍氣盡柔耨鉏張國勢衰笠殪夷酋

渠帥伯麥斃於村前此捷竟無兩言和亦有由從來持大計不用

野人謀

古鏡篇

寶氣難埋厚地裂入土千年尙瑩澈沈沈宿霧開寥天  
精光飛出堯時月團圓背黝蛟螭蟠班駁痕凝土花結  
何時一墮重雲深掘井初驚電光掣後人妍媸詎足辨  
玉臺曾照英皇面毛嫱西子未敢窺一髮微癢恐全現

邇來掩飾術更工莫肯瑕疵與人見勿矜黑白易分明  
恐招時忌相輕賤不如仍返深淵中晦迹勿厭塵沙封  
第令精氣內不滅一任光燄埋蒿蓬豐城斂鏐有寶劍  
洛水沈響湮洪鐘一朝詔下求金鑑再取持獻明光宮

羚羊峽

群峒從西來峽欲截使住兩崖百峯集併力相撐拄江  
勢不肯回左奔復右注有如猛決將匹馬陷陣去萬軍  
合重圍奮起卒相遇冒刃轉戰前夾擊不暇顧前營柵  
已拔後軍熾復豎決盪十餘里勢竟莫能禦沛然潰圍  
出一往如脫兔水聲無渟流山氣鬱餘怒山水詎相爭

陰陽自吞吐

尺岡草堂遺詩卷之一終

男衍緒校字

尺岡草堂遺詩卷二目錄

出門

早行新興山中

望春州諸石

宿橋連驛

度羅黃嶺

道中望白水山

長塘曉發

謁譙國夫人廟

獨遊

旅店阻雨

歸舟

羣玉山房

同恢垣麗東平州訪襄卿

山房對雨同恢垣作

赴板橋黎十招游羅浮之約留宿白茅軒

留題白茅軒壁

游羅浮自石龍放舟暮泊九子潭

山村卽目

黃龍觀

華首臺

自黃龍洞至佛子嶼雨中望諸峯

茶山黃仙觀坐雨

題酥醪觀

移家街西黃氏樓

示弟

丁未歲除

題戴夢若山人羅浮畫冊

徐竹君自瀾中寄詩詢余近况奉答二首

己酉初夏李介持屬題香石先生庚子餞春圖



尺牘草堂遺詩卷二  
簡涉公乞芭蕉

李恢垣單小泉應冕卿李毅伯讀書紅棉寺余時  
時過從前後登臨游息劇談縱飲之樂不可悉  
紀乃爲詩七章聊述其概索諸君和

嘉禾篇效香山體寄伍襄卿

虎門觀潮

偃卧

歸燕

洗硯

夜飲學海堂送李大光廷入都

自倚雲山館至白雲山鶴舒岩宿同遊者周夢石  
陳八桂梁實秋倚雲主人

鶴舒臺題壁

尺岡草堂遺詩卷二

目錄

三

尺岡草堂遺詩卷二目錄終

尺岡草堂遺詩卷之二

番禺陳璞著

出門

丈夫志四方安能守桑梓飢寒生別離去去不計里初  
程附租船挂帆渺烟水篷底雜坐卧相對盡行旅趨事  
各有營求食同一軌高詠誰能聞默坐自爲理岸上桃  
花妍似來慰遊子誰教江月上又照鄉心起

早行新興山中

孤城穿一角嶺路轉千盤月落剛侵曉春初未解寒獨  
先栖鳥起頗問僕夫安彼獨何爲者崎嶇不畏難

望春州諸石

銳同飛掣攢峭作短劍折聚疑重雲凝壁怒雷裂疊  
咤累棋危橫驚萬笏列巉巉數十峯黝黑鑄積鏤拔地  
無寸土嵌空有古穴我行近千里山已百重閱非無疊  
巘青明媚祇相悅維茲嶄巖勢一望嘆奇絕有若大庭  
中森羅百英傑惜哉未一留匆匆去如瞥

宿橋連驛

日落銜山經百里千峯萬峯暝色起牛羊盡下歸鳥稀  
孤客東來行未已烟林轉處一火明斂門入坐床縱橫  
展衾撫枕睡未熟又聽荒雞催起程

度羅黃嶺

危岑跨疊巘倚天如頽雲厓高背朝曦傍午沈煙氛西  
峯得暉映蒼蒼橫錦霞我行兩山閒明晦咫尺分忽過  
萬木杪追逐飛鳥羣嵐光盡破碎俯視仍氤氲生滅本  
一氣變幻何紛紜出谷更回首如畫明斜曛

道中望白水山

崖崇極天峻不斷橫青冥雲開出眾壑百道懸飛清水  
光射日色碎嵌玻璃屏一泉從絕頂下縋千丈繩夭矯  
勢特異草樹相迴縈蒼翠亂烟點中有雞犬聲輿夫指  
告予厥壤如山城我行疾如鳥欲止不得停百里尙回

顧目盡心怛怛

長塘曉發

倦枕夢剛醒籃輿又路邊殘更荒驛火破曙亂山煙異  
地怯初涉浪游慚壯年迷津不敢問恐遇耦耕賢

謁譙國夫人廟

六代更孱主邊隅要重臣霸才鍾子婦荒徼靖兵塵巾  
幘留奇蹟鬚眉愧此身書生在羈旅下拜一酸辛

獨遊

蠻雲黯山色荒澗湧江流兀坐忽不懌短筇成獨遊蒼  
烟城外寺春水渡旁舟生事居人樂誰諳遠客愁

旅店阻雨

不辨千山色濛濛雨似塵夢迴仍遠客行處又濃春慘  
澹干將氣伶俜裋褐身平林煙景好忘是道傍人

歸舟

空江春漲夜冥冥倦客歸舟雨外停千里風塵凋鬢髮  
頻年書劍感飄零瘴烟暮起窮邊黑雲氣朝沈疊嶂青  
自笑勞生成底事無端長路往來經

茫茫奔浪日流東望望端城又眼中歸思慳慳隨逝水  
舊游棖觸歎飛鴻山如來日含殘雨天妬迴帆起朔風  
羨殺沙邊老漁父團圓妻子一孤篷



羣玉山房

在粵秀山麓慶蕉園將軍鎮粵時築也  
丁未歲余與李恢垣同假館其中偶題

長句

小築林亭占一邱憑高對榻足勾留嶺雲避月全依樹

海雨隨風半入樓歌舞久荒南武蹟琴尊坐領越臺秋

幽踪我輩還如寄化鶴飛來可有不

將軍題柱有此地  
種百株梅歸去他

年化一隻鶴  
飛來之句

同恢垣麗東平洲訪襄卿

偶爾乘幽興相將泛野航人家秋水碧村樹荔奴黃中

有古君子邀留深柳堂對床如舊約夜雨聽淋浪

山房對雨同恢垣作

疾風驅雲雲下奔海氣蹙雲雲上屯寥天萬里入黝黑  
天腳一線橫清暎雷聲忽轟電光裂勁弩亂射天瓢翻  
俯瞰江城失萬瓦但有一片濛濛昏山堂巍然獨孤迴  
似在巨海聞濤喧山泉厓木助澎湃滌盪旬次清心魂  
往居湫隘每苦雨床床屋漏無乾痕今來山居見雨喜  
反懼天日恆晴暄居處不同好惡別害不在己情卽欣  
書生意氣似狂誕得自快意他勿論晚來雨勢猶未已  
更呼堂上開清樽

赴板橋黎十招游羅浮之約留宿白茅軒

六載題襟地重來花竹秋

白茅軒不到六年矣

故人古狂士一笑

又登樓幽興欲遺世仙山成熟遊

羅浮君歲一遊

爲余具笠屐

將與問丹印

留題白茅軒壁

秋樹濃陰減茅亭野意多園荒存老竹池淨覆殘荷清  
酒有餘醉勞生能幾何從君持杖去踏遍碧嵯峨

遊羅浮自石龍放舟暮泊九子潭

一溪流水灣復灣羅浮已在睂睫間煙雲杳冥樹滃鬱  
風雨離合峯往還長風吹雲雲不散迷離恟恍無從攀  
遠指澄潭放舟去流波淼瀾杳何處欲求真面不可識  
半入空濛半蒼翠四百三君知我來初日照耀雲爲開

一時淨埽碧鬢黹萬疊聳出青崖鬼葛洪絕頂似招手  
鮑靚待酌流霞杯我喜相從快舉袂飛身欲上金銀臺  
金銀臺是神仙宅躋攀不易塵寰客山靈殆欲警我頑  
未許一朝縱游屐日斜短櫂繫江隈空對巔岼少飛翮  
飛翮難飛我且歌江清亦喜明月多蓬萊終古割左股  
鐵橋鎖紐疇能磨暫留一夕卧孤艇明日終得登嵯峨  
神山可望不可卽風引使遠無如何浮山不能復浮去  
安能使我滅迹二山泉石之坡陀

山村卽目

老幼曉出作無人晝掩扉村荒盜賊遠地瘠遊民稀結

笠野簾短充糧山芋肥斜陽下木末閑跨老健歸

黃龍觀

仙山無恆蹊有徑皆縹緲厓復跨壑高者橫木杪石  
梁駕空出俯睇怯陰窅杖端百雷轉舄下雨龍矯依然  
坐樹根不知已雲表方瞳老道士雪髮垂皎皎延余宿  
瑤宮一榻並栖鳥

華首臺

松櫪知何年晻藹成異境張此萬片雲蔽彼十里景鬚  
眉忽盡綠衣袂亦微冷午鐘出深翠始覺日尙永

林窮劃斷厓飛瀑灑百丈散爲琴筑聲聚作鐘鏞響來

源聞更奇有榻可偃仰

石床在厓上亦有飛泉側注

躡雲欲造巔巘

絕不得上

華嚴修湧現彈指燦金碧

古刹時新修

神峯四百三佛輒占

一席山靈亦皈依合掌轟兩石我來訪烟霞莫問仙與

釋

林木既殊勝泉石復幽邃偶從巖下坐便已忘世事當

年學佛人亦豈凡庸類早見世陸沈高蹈此焉避

明末天然

和尚祝髮於此

自黃龍洞至佛子嶼雨中望諸峯

一峯出雲去一峯復入雲雲澹峯有影峯遠雲不分老

人蒙絮帽玉女曳縞褰巉巉雨石樓隱見出煙氛蒼茫  
忽無際萬壑蒸氤氲我行不知雨往謁雲中君不復巖  
岫識時若風濤聞空濛失向背予還慙慙憑高振衣  
袂溼翠落紛紛

茶山黃仙觀坐雨

蕭條野人廬覆茅亂泉下其前度小閣萬翠到檐瓦我  
來兩三日欲出愁沒踝怡然一榻上坐卧對飛灑朝嵐  
暗巖岫暮藹迷松檟山雲聞有客還沓入廡庑客亦愛  
雲來招邀不肯舍從知泉與雲皆有相知雅攜得杖頭  
壺深杯更堪把

題酥醪觀

何年神女醉仙漿萬片烟霞尚酒香  
綠字靈符留竹葉丹砂餘氣茁山薑  
休論服煉飛昇術自是山林日月長  
洞裏道人多鶴髮問渠卻老本無方

移家街西黃氏樓

愧無湖海元龍氣來臥街西百尺樓  
兀立市廛塵不到盡開軒牖月能留  
攜雛穩似梁間燕浪迹閒仍海上鷗  
廿載荆扉苦埋沒好從天外一昂頭

浮雲西北矗成峯日倚朱闌興未慵  
繞堞滄江波渺渺隔牆烟樹碧重重  
平生頗具嶒嶸槩放眼尤宜浩蕩胸



窮巷况無車馬跡  
敝門獨有客扶筇

朗山襄卿見過

### 示弟

流水何湯湯源泉石上滴  
汝生今十年汝身何由得我  
長汝廿載往事能備悉爲汝  
縷述詳勸念重悲感嗟我  
十三齡失恃痛在昔顧復王  
庶母恩勤爲卵翼父憐我  
靡依汝母作繼室生汝甫兩  
載畜汝復不卒汝時呱呱  
啼我父空悽惻仍累王庶母  
白首不自惜餅餌代乳哺  
襁褓乏婢役提攜與鞠育一  
一躬親歷暨汝能扶床我  
亦稍自植哀哀王母慈背棄  
不我卽老父呼我前泣血  
淚沾臆曰子當幼稚亦復苦  
子特六歲無母兒母視若

已出十二痛汝祖冊載守孤寂汝等又無母重賴老人  
力兩世撫字恩巍哉莫紀極汝輩永念之慎毋負厥德  
我時聞父言凜凜中心惕顧汝尙無知梨栗第思覓今  
汝旣讀書漸當有知識勿如我無成白日駒過隙甘旨  
未能具艱難困衣食致令白髮親行李猶遠適我旣奉  
養缺汝宜思子職嬉戲雖有時逝當念學殖未能大恩  
酬庶使親憂釋

丁未歲除

海國棲遲久天涯日月遷地偏寒不雪春近雨如烟琴  
劍無今古江山自歲年但須謀一醉餘事付高眠

題戴夢若山人羅浮畫冊

故人約訪神仙域未去先教逢妙墨他日峯頭見老人  
不知何處曾相識

四百峯頭烟與雲曾中邱壑已全吞歸來醉後都傾吐  
滿幅嵐光雜酒痕

徐竹君自瀾中寄詩詢余近況奉答二首

年來踪跡似閒鷗江水寒深又過秋冷臥雪中長閉戶  
陸居岸上并無舟退臺破硯生涯在絮被繩床故我留  
醉裏猶堪重看劍不曾彈鋏向王侯

迢迢千里遺雙魚中有新吟慰索居契闊正憐經歲別

疎慵先在遠人書亦知羈旅俱無賴卻羨游踪我不如  
獨臥故園驚日月此身將欲托樵漁

己酉初夏李介持屬題香石先生庚子餞春圖

花墮朱棉萎草長翠纈輒春來本無處春去亦奚餞幽  
人醉無名借以事清宴酒後作圖畫有似鴻爪踐高吟  
杼曠懷流光詎綰繾豈知重披圖歲月驚數轉我雖未  
與會會者多余善哀哉黎與李荒山宿草掩黎介卿李  
質川今皆  
下勝事一迴首飛蓬疾風卷春去春復來良會不可展

簡涉公乞芭蕉

新居有閒庭甃石作花島舊種紅佛桑爛漫照檐棹涼

夏晝雨多狼藉墮階草喜雨卻惜花歡戚併一抱何如  
種芭蕉得雨色逾好昨詣維摩室雲鋪綠天曉數本許  
持贈移植當及早苦竹久已芟荒蘚預爲埽健步何時  
來渴想易顛倒庶幾明日雨清響洗煩惱

李恢垣單小泉應冕卿李毅伯讀書紅棉寺余時  
時過從前後登臨游息劇談縱飲之樂不可悉  
紀乃爲詩七章聊述其概索諸君和

王山高岷嶂粵樹老輪囷一路飛紅雨南州報早春軒  
墀憑絕頂絃誦避囂塵容我常來往招邀有故人  
流連雞黍局幾日興猶酣午倦歸惻臥宵深剪燭談看

花詢舊植作畫縱幽探晨起聞鐘磬方知借佛龕

倚檻無千里江山入掌平一杯師子海萬瓦越王城漠漠蒼烟混重重夕照明恍疑造物外俗慮已澄清

赤日初沒嶺相攜登古臺西江橫地出北嶂擁樓開仄徑牛羊下寥天風雨來回頭暮雲合往蹟已蒿萊

跌宕真宜我山棲德豈孤故交尋學海陳雨甫時借寓學海堂隣

近訪仙都道士舊相識鄭仙祠斯人稱四無雨甫自號以茲

成澹蕩談笑謝拘迂

石渠流暗瀑園徑長春蒿話兩人團坐驚風犬夜嘯山川迷向背林樾湧波濤彷彿靈巖夜聯床百尺高丁未與恢

垣同寓

靈巖

我本塵中士諸君亦寓公長風一朝起踪跡半萍蓬聚散原難定登臨且暫同他年憶陳迹遺爪記飛鴻

嘉禾篇效香山體寄伍襄卿

伍子自平洲遺我禾一莖一莖四歧萬四歧四穗榮秀穎發芳腴苞栗含晶瑩云自村農田得此嘉祥徵十年海氛惡今日烽煙清至仁馴猛虢談笑祛鯢鯨祥和相感召休應茲分明更將卜豐穰詎止銷櫓槍嗟子一窮儒半世行棘荆歲僅一秉獲家無寸田耕我亦抱片石哺啜吸心精富歲世時有倉庾非我盈此誠豐年兆

於已奚重輕君乃走寄示我復發歌聲欣欣不能已則  
亦出至情由來貧家屋鼠亦難爲生眾饑無一飽眾飽  
饑不成幾見秋田雀喙啄費經營安有西江鮒尙若魴  
尾頰吾求況易足脫粟皆瑤瓊菽粟如水火孰不哀獨  
熒更不見兵革樂哉生太平

虎門觀潮

大虎橫蹲小虎躍東瞰重溟控蛟壘長虬怒起挾尾閭  
亂噴驚濤打巉嶠天吳搥鼓海若舞巨魚如人岔騰踔  
噓風挾雨蹴天來萬仞雄關一收縛兩山激水水作雷  
大山倏轉蒼厓開紛如亂兵突排闥飛礮洞穴中崩摧



鬱離西來逐犇馬瀉注千里無停洄卒然相距勢不下  
一氣倒卷牂牁迴我從絕頂覽寥豁誰然陰火煮解渤  
萬頃洪波沸一金溢入扶胥勢滂淖排空外湧銀山高  
卷地內吞沙島沒胷中詎屑雲夢奇眼界應瀛廣陵闊  
潮來洶洶掀巨波潮去蕩蕩青銅磨雷轟電掣儵已退  
極目但見千盤渦汪洋顚森杳莫測吐納萬派如吸呵  
陽侯迴踪百怪寂大虎小虎仍蹇蹇回首昔年海氛警  
巨舶乘潮恣兇梗海門不障狂瀾飛虎頭失險鯨鯢逞  
只今終讐雙厓雄轉眼波濤貼然靜 聖朝詎需強弩  
射馴伏蛟鼉威不猛夜郎自大空爾爲消長同潮只供

頃從今長願海無波獨立蒼茫一延頸

偃卧

偃卧蓬廬擬隱淪濛濛烟雨暗殘春風懷覺比從前滅  
夢想疑無一事真未死可能償酒債難傳或坐作去聲詩  
人豪情收拾高歌罷俯仰堪憐七尺身

歸燕

來時春未半今又變芳菲去國日已久依人計亦非秋  
風鄉思動別緒故巢違詎識無家客年年送汝歸

洗硯

墨君湯沐日石友濯磨時傾盡金壺汁還渠碧玉姿此

心原瑩潔餘瀋尙淋漓珍重防圭玷臨深慎自持

夜飲學海堂送李大光廷入都

聚首已半生一別乃萬里朔風吹林夜色寒把酒空山  
月如水年來朋輩多離羣今年相對惟有君劇談話斷  
半空雨狂歌呼起千峯雲豪懷昨夜忽如掃聞君又向  
幽燕道貢禹彈冠喜詎忘河梁攜手憂心擣夜關秉燭  
益蒼涼舉杯欲飲愁在腸京洛風塵子無慮雨雪關山  
何處望

自倚雲山館至白雲山鶴舒巖宿同遊者周夢石

陳八桂梁實秋倚雲主人

出郭八九里路轉沿深篁幽人愛烟蘿築屋依崇岡人  
門撲寒碧松竹森成行百步得石橋側跨幽澗旁泉流  
瀉縹曲十步迷青蒼紆迴入深處樹隙閑草堂小軒更  
清邃萬个垂琳琅寒梅初着花窺戶凝新粧愛客出百  
壺賞勝飛千觴酒酣登高臺屋岑鬱相望積翠堆屋瓦  
萬疊如屏張白雲近可呼遊興隨飛揚安期定招手導  
我騎鶴翔杖履復出門扳陟緣羊腸旋轉上巔峩々下  
相扶將周翁獨矯捷腰腳老更强高步凌煙霏勇若赴  
敵塲松濤盪空聲厓陰劃斜陽數盤到絕頂小憩尋上  
方山僧苦留客晚食具齊糧延客坐山樓開窗俯蒼茫

月色一照白萬象生清光朔氣雜夜籟四壁酣笙簧宵  
深客欲睡展席還拂床豈意我勞人寄身儵羲皇重雲  
擁清夢夢與泉聲長彷彿古飛仙遺以菖蒲香曉來忘  
城市下視塵沙黃

鶴舒臺題壁

層厓疊巘橫翠屏泉聲激激風泠泠客行山石路犖确  
僧住松蘿雲杳冥今尙木樨傳佛偈舊聞蒲草有仙靈  
危樓一卧墮寒月采藥人歸夢未醒

尺岡草堂遺詩卷之二終

男衍昌校字